



## JUDICIAL SYSTEM MONITORING PROGRAMME

### PROGRAMA DE MONITORIZAÇÃO DO SISTEMA JUDICIAL

#### *Komunikadu Imprensa*

Períodu : Novembru 2011  
Edisaun : 24 Novembru 2011

#### **JSMP hala'ó treinamentu Kódigu Penál ba Lideransa Komunitária iha Sub Distritu Luro- Lautem**

Iha loron 18 Novembru 2011, Judicial System Monitoring Program (JSMP) liu husi Unidade Peskizadór Juridiku no Unidade Relasaun Públiku hala'ó treinamentu Kódigu Penál ba lider Komunitária husi Suco ne'en (Luro, Kota Mutu, Barikafa, Afabubu, Wairoque, Lakaowa) iha Sub Distritu Luro Distritu Lautem.

Totál partisipante sira husi lider komunitária ne'e inklui estrutura konsellu suco hamutuk 26 kompostu husi feto nain 6 no mane nain 20.

Diretór Interinu JSMP, Casimiro dos Santos haktuir katak *objetivu husi treinamentu sira ne'ebé JSMP kontinua halao'ó ne'e hanesan komitmentu hodi kontinua haklaken no fahe informasaun lei ba Lideransa Komunitária sira atu nune'é sira hotu bele iha koñesimentu ne'ebé suficiente konabá setór judisiáriu, nomós iha tempu hanesan bele enkoraza Lider Komunitária sira, hodi involve ativu iha prosesu hametin setór justisa formál tuir sira nia kbi'it.*

Nia hatutan tan katak *ba interese ida ne'e, JSMP sei esforsu nafatin atu bele kontinua halo treinamentu lei iha area rural ne'ebé susar atu asesu ba informasaun relasiona ho lei no justisa.*

Iha parte seluk, Administrador Sub Distritu Luro Sr. Cecilio Sabino Hornai iha abertura ba treinamentu ne'e haktuir katak *“treinamentu ida ne'e importante tebes ba Xefe Suco ho ninia estrutura sira tomak tanbá Lei Kódigu Penál importante tebes ba autoridade lokál sira hodi hasaei sira nia koñesimentu area refere inklui lei sira seluk ne'ebé maka vigora iha ita nia nasaun.*

Aliende ne'e liu husi treinamentu ida ne'e konsellu suco sira mós bele kontinua hatutan informasaun sira ne'e to'o ba iha comunidade nia le'et hodi nune'é comunidade sira mós bele iha koñesimentu konabá lei sira ne'ebé oras ne'e vigor ona.

Liu-tan nia mós hatutan katak husi treinamnetu ne'e atu bele ajuda Xefe do Suco sira bele kompriende no hala'ó sira nia kna'ar tuir lei ne'ebé iha hodi resolve problema ruma ne'ebé maka mósu iha sira nia comunidade.

Durante iha sesaun treinamentu ne'e, JSMP observa katak partisipante sira apresia no ativu tebes hato'ó perguntas liu-liu konabá oinsa atu rezolve problema iha Suco laran tuir lei nia lalaok no prosesu tuir lei.

Iha parte seluk Xefe Suco Kota Mutu Sr. Leopoldino ne'ebé reprezenta Administrador Sub-Distritu Luro hodi halo enseramentu ba treinamentu ne'e haktuir katak 'treinamentu ne'ebé JSMP oferese ba Konsellu Suco iha Sub – Distritu Luro ne'e, nu'udar pasu importante tebes no persiza duni atu membru iha suco ida idak ne'ebe partisipa ne'e fó atensaun tanbá atividade ida ne'e sei ko'alia konabá Lei Kódigu Penál ne'ebé regula tipu kazu kriminal sira hotu iha vida sociedade loron-loron nian. Liu-liu, tuir Xefe de Suco ne'e katak membru suco sira presiza hatene tanbá bainhira atu resolve problema ruma ita iha ona bukae hodi haree ba problema ne'ebé akontese iha ita nia comunidade.

Iha sira nia intervensaun husu atu Governu no Parlamentu Nasionál halo sosializasaun ba lei sira ne'ebé maka aprova ka promulga ona to'o ba areas rurais atu nune'e comunidade sira iha foho bele hatene tuir lei formál sira refere.

JSMP observa ba programa treinamentu ne'e katak, partisipante sira antusiasmu tebes no halo diskusaun konabá sira nia esperensia loron-loron nian hodi rezolve problema tuir lisan ka kultura no prosesa kazu tuir lei formál.

Tuir sira balun nia hanoin katak durante ne'e seidaok iha lei hodi regula konabá hahalok oho ema, baku malu no krime sira seluk. Sira mós kestiona ezisténsia lei formál ne'ebé sente ba hanesan ameasa ba lei tradisionál Timór nian. Sira lamenta mós konabá frakeza lei formál ne'ebé la fó kastigu todan ba arguidu sira liu-liu konabá pena suspensaun ne'ebé maka aplika iha lei formál.

JSMP hein katak ho programa ne'e bele apoiu comunidade sira iha área refere hodi hametin diak liu koñesimentu membru Lider Komunitária sira iha aspetu responsabilidade sira nian hodi fornese apoiu no medida ne'ebé apropriadu ba sira nia comunidade iha suco laran .

Atu hetan informasaun kle'an, favor kontaktu;

Casimiro dos Santos

Diretór Interinu JSMP

E-mail: [casimiro@jsmp.minihub.org](mailto:casimiro@jsmp.minihub.org)

Landline: 3323883/7257466